

3-bob. Tovarlar va transport vositalarini bojxona chegarasi orqali olib o'tish

16-modda. Tovarlar va (yoki) transport vositalarini bojxona chegarasi orqali olib o'tish shartlari

Tovarlar va (yoki) transport vositalarini bevosita bojxona chegarasi orqali olib o'tishga qaratilgan harakatlar jumlasiga quyidagilar kiradi:

bojxona chegarasini kesib o'tayotgan jismoniy shaxsning bojxona nazorati zonasiga kirishi;

transport vositasining bojxona chegarasini kesib o'tish maqsadida O'zbekiston Respublikasi Davlat chegarasidan o'tkazish punktiga kirishi;

bojxona hududiga yo'llash yoki ushbu hududdan tashqariga jo'natish uchun tovarlarni transport tashkilotlariga yoxud xalqaro pochta va kuryerlik jo'natmalarini pochta aloqasi operatorlari va provaydyerlariga topshirish;

jismoniy shaxsning qonun hujjatlariga muvofiq belgilanmagan joylardan tovarlar va (yoki) transport vositalari bilan bojxona chegarasini amalda kesib o'tishga qaratilgan harakatlari.

Tovarlar va (yoki) transport vositalarini bojxona hududiga olib kirish shartlari tovarlar va (yoki) transport vositalari bilan bojxona chegarasini amalda kesib o'tishdan hamda ushbu tovarlar va (yoki) transport vositalari bilan ushbu Kodeksda nazarda tutilgan keyingi barcha harakatlarni ular bojxona organlari tomonidan chiqarib yuborilguniga qadar amalga oshirishdan iborat.

Tovarlar va (yoki) transport vositalari bojxona hududiga olib kirilayotganda tashuvchi ularni tayinlangan bojxona organi joylashgan yerga yoki boshqa joyga ushbu Kodeksning [218-](#)

moddasida belgilangan muddatlarda yetkazib berishi shart. Bunda tovarlarning holatini o'zgartirishga yoki ularning o'rovini buzishga, shuningdek qo'yilgan plombalarga, muhrlarga va bojxona identifikatsiyasining boshqa vositalariga shikast yetkazilishiga yo'l qo'yilmaydi.

Bojxona deklaratsiyasini berish yoki ushbu moddaning birinchi qismida ko'rsatib o'tilgan, tovarlarni va (yoki) transport vositalarini mazkur hududdan bevosita olib chiqishga qaratilgan boshqa harakatlarni amalga oshirish, shuningdek tovarlar va (yoki) transport vositalari bilan ushbu Kodeksda nazarda tutilgan keyingi barcha harakatlarni ular amalda bojxona chegarasini kesib o'tguniga qadar bajarish tovarlarni va (yoki) transport vositalarini bojxona hududidan olib chiqish shartlari hisoblanadi.

Tovarlarini bojxona hududidan olib chiqishga ular ushbu Kodeksga muvofiq olib chiqilayotgan tovarlarga nisbatan qo'llaniladigan tegishli bojxona rejimiga joylashtirilganidan so'ng yo'l qo'yiladi. Tovarlar va (yoki) transport vositalari bojxona nazoratidan o'tkazilmasdan mazkur hududdan olib chiqilishi mumkin emas. Bojxona nazorati tashuvchining tovarlarni va (yoki) transport vositalarini olib chiqish niyati borligidan oldindan xabardor qilish asosida bojxona organi tomonidan o'tkazilishi mumkin.

O'zbekiston Respublikasining milliy valyutasini hamda valyuta boyliklarini bojxona chegarasi orqali olib o'tish qonun hujjatlariga muvofiq amalga oshiriladi.

17-modda. Tovarlar va (yoki) transport vositalari olib kirilishidan (olib chiqilishidan) bojxona organlarini xabardor qilish

Tovarlar va (yoki) transport vositalari bojxona hududiga olib kirilayotganda tashuvchi bojxona organini bojxona chegarasini kesib o'tishidan xabardor qilishi shart.

Tashuvchi yoki boshqa manfaatdor shaxs tovarlar va (yoki) transport vositalari bojxona hududiga amalda yetib kelguniga qadar ular to'g'risida bojxona organiga dastlabki axborotni taqdim etishga haqli.

O'zbekiston Respublikasining xalqaro shartnomalarida va (yoki) qonun hujjatlarida nazarda tutilgan hollarda, tovarlar va (yoki) transport vositalari bojxona hududiga amalda yetib kelguniga qadar tashuvchi yoki boshqa manfaatdor shaxs ular to'g'risidagi dastlabki axborotni bojxona organiga taqdim etishi shart.

Tovarlar va (yoki) transport vositalari bojxona hududidan tashqariga olib chiqilayotganda, ularni olib o'tayotgan shaxs ushbu tovarlarni va (yoki) transport vositalarini olib chiqish niyati borligidan bojxona organlarini oldindan xabardor qiladi. Bojxona organi bojxona rasmiylashtiruvini amalga oshirish uchun tovarlar va (yoki) transport vositalari yetib kelishi kerak bo'lgan vaqt va joyni tayinlaydi. Agar tovarlarni va (yoki) transport vositalarini olib o'tayotgan shaxs ko'rsatilgan xabardor qilishni amalga oshirmaydigan bo'lsa, bunday majburiyat tashuvchining zimmasiga yuklatiladi.

Bojxona chegarasi kesib o'tilayotganda bojxona organini xabardor qilish bojxona chegarasi orqali o'tkazish punktida joylashgan bojxona organiga tovarlarni va (yoki) transport vositalarini, ularning tovar kuzatuv hujjatlarini taqdim etish yo'li bilan amalga oshiriladi.

Bojxona organlari ushbu moddaning [beshinchi qismida](#) nazarda tutilgan hujjatlarni qabul qilishni rad etishga haqli emas.

Bojxona chegarasi orqali tovarlarning quvur transporti va elektr uzatish liniyalari orqali olib o'tilishi to'g'risida xabardor qilish ushbu Kodeksning [25-bobiga](#) muvofiq amalga oshiriladi.

O'zbekiston Respublikasi hududida joylashgan daryo portida yoki aeroportda to'xtamasdan bojxona hududini kesib o'tadigan daryo va havo kemalariga nisbatan ushbu modda talablari qo'llanilmaydi.

18-modda. Tovarlar va (yoki) transport vositalari bojxona hududiga olib kirilayotganda taqdim etiladigan hujjatlar

Tovarlar va (yoki) transport vositalari bojxona hududiga olib kirilayotganda tashuvchi bojxona organiga quyidagilarni taqdim etishi shart:

1) avtotransport vositasida xalqaro tashish chog'ida:

a) avtotransport vositasiga taalluqli quyidagi hujjatlarni:

Yo'l harakati to'g'risidagi [konvensiyaga](#) (Vena, 1968-yil 8-noyabr) muvofiq avtotransport vositasining ro'yxatdan o'tkazilganligi to'g'risidagi guvohnoma;

O'zbekiston Respublikasining xalqaro shartnomalarida nazarda tutilgan hollarda chet el avtotransport vositalarining O'zbekiston Respublikasi hududiga kirishi, hududidan chiqishi va tranzit tarzida o'tishi uchun vakolatli organning ruxsatnomasi;

yuklar xalqaro yo'llarda tashish (bundan buyon matnda XYT deb yuritiladi) daftarchasini qo'llagan holda tashilgan taqdirda, XYT daftarchasini qo'llagan holda yuklarni xalqaro tashish to'g'risidagi bojxona [konvensiyasi](#) (Jeneva, 1975-yil 14-noyabr) talablariga muvofiq avtotransport vositasiga yuklarni

bojxona plombalari va muhrlari ostida xalqaro tashishga ruxsat berilganligi to‘g‘risidagi guvohnoma;

tez buziladigan mahsulotlar tashilayotganda, tez buziladigan mahsulotlarni tashish uchun avtotransport vositasiga ruxsat berilganligi to‘g‘risidagi guvohnoma;

xavfli yuklar tashilayotganda, xavfli yuklarni tashish uchun avtotransport vositasiga ruxsat berilganligi to‘g‘risidagi guvohnoma;

b) tovarga taalluqli quyidagi hujjatlarni:

Yuklarni xalqaro yo‘llarda tashish shartnomasi to‘g‘risidagi [konvensiya](#) (Jeneva, 1956-yil 19-may) talablariga muvofiq tovar-transport yuk xati;

yuklar XYT daftarchasi qo‘llanilgan holda tashilgan taqdirda, XYT daftarchasini qo‘llagan holda yuklarni xalqaro tashish to‘g‘risidagi bojxona [konvensiyasiga](#) (Jeneva, 1975-yil 14-noyabr) muvofiq XYT daftarchasi;

tijorat hujjatlari;

xalqaro pochta jo‘natmalarini kuzatib borish uchun Umumjahon pochta ittifoqi hujjatlarida belgilangan hujjatlar;

v) ushbu bandning [“a”](#) va [“b” kichik bandlarida](#) nazarda tutilgan hujjatlarda ko‘rsatilishi kerak bo‘lgan quyidagi ma’lumotlarni:

tashuvchining nomi va pochta manzili;

tashish uchun tovar qabul qilinadigan joy (mamlakat) va yetkazib berilishi mo‘ljallangan joy (mamlakat);

tovarlar jo‘natgan mamlakatning va tovarlar kelib tushadigan mamlakatning nomi;

tovarlarni jo‘natuvchining va oluvchining nomi hamda pochta manzili;

Umumjahon bojxona tashkilotining Tovarlarni tavsiflash va kodlashtirishning uygʻunlashtirilgan tizimiga muvofiq tovarlarning nomi va kamida oltita belgi darajasidagi kodlari, bundan xalqaro pochta va kuryerlik joʻnatmalari mustasno;

tovarning har bir koʻrsatilgan kodi boʻyicha tovarlarning brutto ogʻirligi (kilogrammlarda) va faktura qiymati;

yuk joylarining soni;

konteynyerlarning identifikatsiya raqamlari;

2) suv transportida xalqaro tashish chogʻida:

a) quyidagilarni:

umumiy deklaratsiya;

tovarlarning deklaratsiyasi;

kema ashyo-anjomlari toʻgʻrisidagi deklaratsiya;

kema ekipajining shaxsiy buyumlari toʻgʻrisidagi deklaratsiya;

kema xizmatchilarining roʻyxati;

yoʻlovchilar roʻyxati;

transport hujjatlari;

tijorat hujjatlari;

xalqaro pochta joʻnatmalarini kuzatib borish uchun Umumjahon pochta ittifoqi hujjatlarida belgilangan hujjatlar;

b) ushbu bandning “a” kichik bandida nazarda tutilgan hujjatlarda koʻrsatilishi kerak boʻlgan quyidagi maʼlumotlarni:

kemaning roʻyxatdan oʻtkazilganlik raqami va milliy mansubligi;

kemaning nomi;

kapitanning familiyasi;

kema agentining familiyasi va manzili;

kemadagi yo'lovchilarning soni, familiyasi, ismi, fuqaroligi (mansubligi), tug'ilgan sanasi va joyi, chiqish va tushish porti;

ekipaj a'zolarining soni va tarkibi;

kema jo'naydigan portning va kiradigan portning nomi;

Umumjahon bojxona tashkilotining Tovarlarini tavsiflash va kodlashtirishning uyg'unlashtirilgan tizimiga muvofiq tovarlarning nomi va kamida oltita belgi darajasidagi kodlari, bundan xalqaro pochta va kuryerlik jo'natmalari mustasno;

tovarning har bir ko'rsatilgan kodi bo'yicha tovarlarning brutto og'irligi (kilogrammlarda) va faktura qiymati;

yuk joylarining soni;

tovarlar yuklangan portning va tushiriladigan portning nomi;

konosamentlarning yoki ushbu portda tushirilishi lozim bo'lgan tovarlarga doir dengiz (daryo) orqali tashish shartnomasi mavjudligini va uning mazmunini tasdiqlovchi boshqa hujjatlarning raqamlari;

bortda qoladigan tovarlar tushiriladigan portlarning nomi;

kema ashyo-anjomlarining miqdori ko'rsatilgan holda ularning nomi;

tovarlarni kemada joylashtirish tavsifi;

3) havo transportida xalqaro tashish chog'ida:

a) Xalqaro fuqaro aviatsiyasi to'g'risidagi [konvensiyaga](#) (Chikago, 1944-yil 7-dekabr) muvofiq quyidagi hujjatlarni:

bosh deklaratsiya;

yuk qaydnomasi;

avia yuk xati;

avia yuk xatiga ilova qilinadigan tijorat hujjatlari. Tovar turkumlab tashilgan taqdirda mazkur hujjatlar tovarning birinchi turkumiga taqdim etiladi;

xalqaro pochta jo'natmalarini kuzatib borish uchun Umumjahon pochta ittifoqi hujjatlarida belgilangan hujjatlar;

b) ushbu bandning “a” kichik bandida nazarda tutilgan hujjatlarda ko'rsatilishi kerak bo'lgan quyidagi ma'lumotlarni:

havo kemasining milliy mansubligi belgilarini va ro'yxatdan o'tkazilganlik belgilarini ko'rsatish;

havo kemasining reys raqami, parvoz yo'nalishini, uchish punktini, yetib borish punktini ko'rsatish;

havo kemasi ekspluatantining nomi;

ekipaj a'zolarining soni;

Umumjahon bojxona tashkilotining Tovarlarini tavsiflash va kodlashtirishning uyg'unlashtirilgan tizimiga muvofiq tovarlarning nomi va kamida oltita belgi darajasidagi kodlari, bundan xalqaro pochta va kuryerlik jo'natmalari mustasno;

avia yuk xatining raqami, avia yuk xati va tovar turkumi bo'yicha o'rinlarning soni;

tovar jo'natiladigan va yetib boradigan punktlarning nomi;

parvoz qiladigan havo kemasining bortiga yuklanadigan bort ashyo-anjomlarining soni (har bir tovarning soni va nomi);

havo kemasi bortida xalqaro pochta va kuryerlik jo'natmalarining mavjudligi;

tovarning har bir ko'rsatilgan kodi bo'yicha tovarlarning brutto og'irligi (kilogrammlarda) va faktura qiymati;

4) temir yo'l transportida xalqaro tashish chog'ida:

a) Xalqaro temir yo‘l yuk yo‘nalishlari to‘g‘risidagi bitimga (1951-yil 1-noyabr) muvofiq quyidagi hujjatlarni:

tovarning kuzatuv hujjatlari;

temir yo‘lning harakatdagi tarkibiga doir topshirish qaydnomasi;

xalqaro pochta jo‘natmalarini kuzatib borish uchun Umumjahon pochta ittifoqi hujjatlarida belgilangan hujjatlar;

b) ushbu bandning “a” kichik bandida nazarda tutilgan hujjatlarda ko‘rsatilishi kerak bo‘lgan quyidagi ma‘lumotlarni:

tovarni jo‘natuvchining nomi va pochta manzili;

tovarni oluvchining nomi va pochta manzili;

tovar jo‘natiladigan stansiyaning va yetib boradigan stansiyaning nomi;

Umumjahon bojxona tashkilotining Tovarlarni tavsiflash va kodlashtirishning uyg‘unlashtirilgan tizimiga muvofiq tovarlarning nomi va kamida oltita belgi darajasidagi kodlari, bundan xalqaro pochta va kuryerlik jo‘natmalari mustasno;

tovarning har bir ko‘rsatilgan kodi bo‘yicha tovarlarning brutto og‘irligi (kilogrammlarda) va faktura qiymati;

yuk joylarining soni;

konteynerlarning identifikatsiya raqamlari.

Ushbu moddaning birinchi qismida ko‘rsatilgan hujjatlar bojxona organlariga davlat tilida yoki xalqaro tashishlarda qo‘llaniladigan boshqa tillarda taqdim etiladi. Xalqaro tashishlarda qo‘llaniladigan boshqa tillarda taqdim etilgan hujjatlar, zarur hollarda, davlat tiliga tarjima qilinib, tashuvchi tomonidan tasdiqlangan bo‘lishi kerak.

O‘zbekiston Respublikasi hududiga olib kirilishi ruxsat etish xususiyatiga ega bo‘lgan hujjatlar olinishini talab etadigan tovarlarga va (yoki) transport vositalariga nisbatan bojxona organi bunday hujjatning bojxona organlarining axborot tizimida mavjudligini mustaqil ravishda tekshiradi.

Tovarlar va (yoki) transport vositalari bojxona hududiga olib kirilayotganda bojxona organi ushbu moddada nazarda tutilganidan boshqa hujjatlar va ma’lumotlarni talab qilishga haqli emas.

19-modda. Tovarlar va (yoki) transport vositalari bojxona hududidan olib chiqilayotganda taqdim etiladigan hujjatlar

Tovarlar va (yoki) transport vositalari bojxona hududidan olib chiqilayotganda tashuvchi bojxona deklaratsiyasini yoki ularni bojxona hududidan olib chiqishga yo‘l qo‘yuvchi boshqa hujjatni, shuningdek tovarlarni tashish amalga oshirilayotgan transportning turidan kelib chiqqan holda, ushbu Kodeksning [18-moddasida](#) nazarda tutilgan hujjatlar va ma’lumotlarni bojxona organiga taqdim etishi shart.

20-modda. Tovarlarini va (yoki) transport vositalarini bojxona chegarasi orqali olib o‘tish joyi hamda vaqti

Tovarlar va (yoki) transport vositalari bojxona hududiga olib kirilayotganda hamda ushbu hududdan olib chiqilayotganda ularni bojxona chegarasi orqali olib o‘tishga bojxona chegarasi orqali o‘tkazish punktlarida yo‘l qo‘yiladi va transport vositalarini maxsus belgilangan joylarda to‘xtatgan holda, bojxona organlarining ish vaqtida amalga oshiriladi. Mazkur talabga rioya etilmagan taqdirda bojxona organlari ushbu transport vositalarini majburiy to‘xtatib qo‘yadilar.

Tovarlar olib kiriladigan yoki olib chiqiladigan quyidagi maxsus jihozlangan joylar bojxona chegarasi orqali o'tkazish punktlari hisoblanadi:

havo transporti orqali olib o'tishda — bojxona hududidagi yetib kelinadigan (jo'natiladigan) aeroport yoki tovarlarni tashiyotgan havo kemasi qo'nadigan (parvoz qiladigan) va tovarlarni tushiradigan (yuklaydigan) birinchi (oxirgi) aeroport;

daryo transporti orqali olib o'tishda — bojxona hududidagi tovarlar tushiriladigan (ortiladigan) birinchi (oxirgi) daryo porti yoki qayta yuklanadigan daryo porti;

quvur transporti orqali va elektr uzatish liniyalari bo'yicha olib o'tishda — hisobga olish asboblarning O'zbekiston Respublikasi Davlat bojxona qo'mitasi bilan kelishilgan holda o'rnatilgan joylari;

ushbu modda ikkinchi qismining [ikkinchi](#) va [uchinchi xatboshilarida](#) nazarda tutilmagan boshqa turdagi transportda olib o'tishda — yo'nalishdagi birinchi (oxirgi) bojxona organi.

Bojxona chegarasi orqali o'tkazish punktlari joylashgan yerlar, bojxona organlarining ish vaqti, transport vositalarining to'xtash va turish joylari, ular turishining davomiyligi, shuningdek mazkur joylarning o'tkazish punktlarida ko'rsatilishi tegishli vakolatli davlat organlari va tashkilotlari bilan kelishilgan holda O'zbekiston Respublikasi Davlat bojxona qo'mitasi tomonidan belgilanadi.

Bojxona chegarasi bilan O'zbekiston Respublikasi Davlat chegarasi bir-biriga to'g'ri kelib qolgan joylarda bojxona chegarasidagi o'tkazish punktlari joylashadigan yerlar O'zbekiston Respublikasi Vazirlar Mahkamasi tomonidan belgilanadi.

Transport vositalari to‘xtab turishining davomiyligi bojxona nazorati va bojxona rasmiylashtiruvi manfaatlariga zid ravishda qisqartirilishi mumkin emas.

Transport vositalarini belgilangan to‘xtash va turish joylaridan jo‘natish zarur bojxona tartib-taomillari tugallanganidan so‘ng amalga oshiriladi.

Tovarlarni va (yoki) transport vositalarini bojxona chegarasi orqali belgilanmagan joylardan olib o‘tish O‘zbekiston Respublikasi Vazirlar Mahkamasining qaroriga binoan amalga oshirilishi mumkin.

Ushbu moddaning qoidalari O‘zbekiston Respublikasi hududida joylashgan daryo portida yoki aeroportda to‘xtamasdan bojxona hududini kesib o‘tayotgan daryo va havo kemalari orqali tashilayotgan tovarlarga nisbatan tatbiq etilmaydi.

Bojxona organlari bojxona chegarasi orqali o‘tkazish punktlari to‘g‘risida, belgilangan taqiqlar va cheklovlar, shuningdek bojxona organlarining ish vaqti haqida hammabop shaklda axborot taqdim etishi shart.

21-modda. Bojxona nazorati va bojxona rasmiylashtiruvi

Bojxona chegarasi orqali olib o‘tiladigan tovarlar va transport vositalari bojxona nazoratidan hamda bojxona rasmiylashtiruvidan o‘tkazilishi kerak.

Bojxona nazorati O‘zbekiston Respublikasining qonun hujjatlari va xalqaro shartnomalariga rioya etilishini ta‘minlash uchun bojxona organlari tomonidan amalga oshiriladigan, shu jumladan xavfni boshqarish tizimi qo‘llanilgan holda amalga oshiriladigan chora-tadbirlar majmuidan iboratdir.

Bojxona chegarasidan olib o‘tiladigan tovarlar va transport vositalari ustidan bojxona nazoratini ta‘minlash uchun bojxona

organlarining mansabdor shaxslari tomonidan o'tkaziladigan bojxona operatsiyalari majmui bojxona rasmiylashtiruvi hisoblanadi.

Bojxona nazorati va bojxona rasmiylashtiruvi amalga oshirilayotganda bojxona organlari hamda ularning mansabdor shaxslari qonun hujjatlarida nazarda tutilmagan taqiqlar va cheklovlarni belgilashga haqli emas

22-modda. Shartli chiqarib yuborilgan tovarlar

Shaxsning belgilangan talablar va shartlarga rioya etish majburiyatlariga bog'liq tarzda tovarning chiqarib yuborilishi shartli chiqarib yuborish hisoblanadi.

Quyidagilar shartli chiqarib yuborilgan tovarlar deb hisoblanadi:

a) bojxona to'lovlarini to'lash bo'yicha imtiyozlar berilganligi munosabati bilan foydalanilishi va tasarruf etilishi cheklangan tovarlar;

b) boj olinmaydigan savdo, bojxona hududida qayta ishlash, vaqtincha olib kirish, bojxona tranziti bojxona rejimlariga joylashtirilgan tovarlar;

v) bojxona to'lovlari shartli bojxona qiymatini aniqlash asosida to'langan tovarlar;

g) bojxona to'lovlari davriy bojxona to'lovlari shaklida to'langan tovarlar;

d) zarur hujjatlar (bundan muvofiqlik sertifikatini va ruxsat etish xususiyatiga ega boshqa hujjatlar mustasno) va ma'lumotlar taqdim etilmagan tovarlar;

e) bojxona to'lovlarini kechiktirib yoki bo'lib-bo'lib to'lashga ruxsat berilgan holda erkin muomalaga chiqarish (import) bojxona rejimiga muvofiq rasmiylashtirilgan tovarlar.

Mazkur moddaning ikkinchi qismi “a” bandida ko'rsatib o'tilgan shartli chiqarib yuborilgan tovarlardan faqat bojxona to'lovlarini to'lash bo'yicha imtiyozlar berish shartlariga muvofiq bo'lgan maqsadda foydalanilishi mumkin. Mazkur tovarlardan ular nima maqsadda shartli chiqarilgan bo'lsa, faqat o'sha maqsadda foydalanilishi lozim. Bojxona to'lovlari bo'yicha berilgan imtiyozlar to'langan taqdirda shartli chiqarib yuborilgan tovarlardan boshqa maqsadlarda foydalanishga yo'l qo'yiladi.

Mazkur moddaning ikkinchi qismi “d” bandida ko'rsatib o'tilgan shartli chiqarib yuborilgan tovarlarni uchinchi shaxslarga berish, shu jumladan ularni sotish yoki o'zga usulda boshqa shaxsga o'tkazish orqali berish taqiqlanadi, mazkur tovarlarni olib kirishga doir cheklovlar ushbu tovarlarning sifati va xavfsizligi tekshirilishi munosabati bilan belgilangan hollarda esa, har qanday shaklda foydalanish (ishlatish) taqiqlanadi.

Tovarlar, agar qonun hujjatlarida boshqacha tartib nazarda tutilmagan bo'lsa, shartli chiqarib yuborishning shartlari bo'yicha majburiyatlar bajarilguniga qadar shartli chiqarilgan hisoblanadi.

23-modda. Tovarlarni va transport vositalarini bojxona chegarasi orqali olib o'tishga doir cheklovlar

Tovarlarni va (yoki) transport vositalarini bojxona chegarasi orqali olib o'tishga doir cheklovlar xalqaro majburiyatlardan, ichki bozorni himoya qilish zarurligidan kelib chiqqan holda, shuningdek chet davlatlar va ular ittifoqlarining O'zbekiston Respublikasi manfaatlarini kamsituvchi yoki

cheklovchi boshqa harakatlariga javob chorasi tariqasida qonun hujjatlariga muvofiq belgilanishi mumkin. Mazkur cheklovlar kiritilishi munosabati bilan tovarlarni olib o'tayotgan shaxsda yoxud tashuvchida yuzaga kelgan xarajatlarning o'zni bojxona organlari tomonidan qoplanmaydi.

24-modda. Tovarlar va transport vositalari olib kirilishini hamda olib chiqilishini taqiqlash

Davlat xavfsizligini ta'minlash, jamoat tartibini, inson hayoti va sog'lig'ini saqlash, atrof muhitni muhofaza qilish, milliy va ma'naviy qadriyatlarni saqlab qolish, O'zbekiston Respublikasi va boshqa mamlakatlar xalqlarining madaniy boyliklarini, mulk huquqini, shu jumladan intellektual mulk obyektlariga bo'lgan huquqni, olib kirilayotgan tovarlar iste'molchilarining manfaatlarini himoya qilish maqsadida, shuningdek O'zbekiston Respublikasining boshqa manfaatlaridan kelib chiqqan holda, O'zbekiston Respublikasining qonun hujjatlariga va xalqaro shartnomalariga muvofiq ayrim tovarlarni va (yoki) transport vositalarini O'zbekiston Respublikasi hududiga olib kirish hamda ushbu hududdan olib chiqish taqiqlanishi mumkin.

(24-moddaning birinchi qismi O'zbekiston Respublikasining 2018-yil 18-apreldagi O'RQ-476-sonli Qonuni tahririda — Qonun hujjatlari ma'lumotlari milliy bazasi, 19.04.2018-y., 03/18/476/1087-son)

Olib kirilishi va olib chiqilishi taqiqlangan tovarlar va (yoki) transport vositalari, agar O'zbekiston Respublikasining qonun hujjatlarida yoki xalqaro shartnomalarida boshqacha tartib nazarda tutilmagan bo'lsa, ular olib kirilganda — darhol bojxona hududidan tashqariga olib chiqilishi yoxud ular olib chiqilganda — darhol bojxona hududiga qaytarilishi shart.

Tovarni olib chiqish yoki qaytarish, shuningdek yuk operatsiyalari tovarni olib o'tayotgan shaxs yoxud tashuvchi tomonidan amalga oshiriladi.

Agar tovar darhol olib chiqilmagan yoki qaytarilmagan bo'lsa, tovar bojxona organi egasi bo'lgan bojxona omboriga yoxud bojxona nazorati zonalariga tovarni olib o'tayotgan shaxs yoki tashuvchi hisobidan vaqtincha saqlash bojxona rejimiga joylashtirilishi lozim. Bunday tovarni saqlashning eng ko'p muddati, agar qonun hujjatlarida ayrim turdagi tovarlarga nisbatan boshqacha muddat nazarda tutilmagan bo'lsa, uch sutkani tashkil etadi. Ushbu muddat tugagach, mazkur tovarni tasarruf etish davlat daromadiga o'tkazilishi lozim bo'lgan tovarlarga nisbatan qo'llaniladigan tartibga muvofiq amalga oshiriladi.